

## El' « Piercing ».

Quand du sûs rintré à l'escole primaire,d'ai r'çû à m'marraine in gros dictionnére.Nî là trop grand mais s'pais comme ène boîte à solés.  
 Au début,les mots.A l'fin les noms prop's èyè au mitant saquant feuilles roses avû les citations latines.(Madame Arèna n'astoût nî co v'nue au monde pou indvintér d'supprimer ces pâdjes-la!)  
 Vu l'volume dè l'engin,nî question d'poumènér avû dins s'carnassière,donec l d'moroût bîn in évidence su l'pètit banc qui m'chervoût d'bureau.  
 Comme vous aut's put'êt,d'ai coumminchî pa l'feuill'tér èyè ravisér les imâdjes:les machines,les monumints,el' tiesse des hommes célèbres,...

Il a in imâdje qui m'a fait ène bèquée peu:ça r'présintoût in « Australopithèque »:in boulhomme tout basané,avû in baston pointu à s'main,des ch'veux crollés comme in bèdot èyè **in ocha dins s'nez!**  
 In bia gros ocha,mis d'trèvî;du m'dèmandoûs min-me commint ç'qu'on avoût fait pou inwan-nér ça au trèvî dè s'nez?

A l'heûre d'audjoûrd'hû,ç'in dèv'nu courant.On vos stitche des annias dè tous costés:Dins vos nez (à gauche ou bîn à dwoite,au mitant ou bîn in whaut mais là,ça fait pu maû),dins vos machelles (des grands formats),dins vo minton (ç'es't'imbétant pou fai s'barbe) ou bîn co dins vo langue (là,ç'es't'imbétant pou d'visér).On appelle ça :**el piercing.**

I paraî min-me qu'il a des feumes qui in mett'té à in indwoit qu'on n'peut foque aboûrdér du d'bout des léves!Vo viyèz l'djeu dè d'çi si l'homme d'a yun ètou dins ces invirons-la!

D'jà qu'ç'in dangereux dè s'rimbrassî si on a tous les deux in appareil pou r'dressî les dints,I n'faut nî d'mandér si l'accrochâdje es' produit à l'whauteûr des scan'sons!

El dérin coûp què du d'ai vu yun d'piercing,el gaillard avoût in soit-disant brillant dins ses sourcils!Du li a d'mandé si çî in clips mais I m'a certifiyî què çî du ferme èyè dèfinitif.

Du m'sûs dit in mi-min-me:"El djoû qu'vo djambotte va s'pind' là-d'sus,vo dallèz vîre des indiens à bicyclette!"

Imaginez m'paû què no lieut'nant-gouverneûr nos oblîdje à mett' no n'insigne Kiwanis à no oreye:Pou les clubs dè feumes,ça pût co dallér mais pour nous-aut's?

Co bîn heureux qu'l n'exîdje nî dè l'pind à no nez:Là,les hommes èyè les feumes sarîn'té égâls mais on âroût vramint l'air biesse testous!

Comme on n'sait jamais,du vos conseille dè tind' l'orèye.Si ça tombe,il a maû compris l'dèvisè:"faites à in aut' s'què vo voudrî qu'l vo f'sîge".



Dernière minute: D'ai d'mandé à Zante dè s'informér: El lieut'nant-gouverneur dè ç'n'année-ci es't'in homme foürt intelligent èyè raisonnâb': Vos povèz doûrmi su vos deux orèyes.

Allez, à l'prochaine biestrie!

Françwès.

Solées = souliers/carnassière = cartable/chervi = servir/bèdot = mouton/  
ocha = os/d'trèvî = de travers/inwan-nér = introduire/stitchî = introduire/  
biestrie = bêtise.